

千  
山  
詩  
集

千山詩集卷十三

博羅剎人可禪師著

七言律五

和謙公雪中見懷韻

居山偏不喜看山雪盡披衣偶啟關爲有甚因干壑苦  
如何頓老一朝顏忽思振策隨雲去纔欲過橋又獨還  
書報故人無一好道心客夢已全刪

大雪用棲賢寄阿字九江韻

任風飄泊不須慙便使填溝也不傷入谷孤寒深自得

到天青白恨難藏紅鑪熱焰心無近荒嶺殘枝夢又長  
五老瀑飛遼海鶴好携明月共升堂

和心公雪中見懷韻

初飄數點著衣輕冷入匡牀夢不成想爾獨吟支瘦骨  
無人直下到深更忽疑近戶看無跡自起吹燈聽有聲  
只此朋情渾莫柰鄉心又逐曉鐘生

和棲賢送阿字出塞詩

千里同風遠寄書天山翹首獨躊躇冰雪有緣兼累若  
父兄何事苦憐余白骨此中還得見黃沙之外更無餘  
何時生入盧龍塞金井梅花是舊廬

步棲賢和阿字九日韻

垂死經今又十秋  
莫嫌齒落雪盈頭  
三張紙寄長榆塞  
萬里雲封大石樓  
父子枉勞沙畔冷  
身名真愧世間浮  
團團夜夜無窮淚  
天上如今是惠州

恭和棲賢法兄奉懷本師老人韻

雙錫香巖望又虛  
栢林回憶侍巾初  
鴈翎各散予偏遠  
獅乳同餐爾自餘  
五石城邊音寂寂  
萬松坪下步徐徐  
會須連袂依霜鬢  
未必羅浮剩舊廬

從駐蹕峯移向陽二首

短髮隨身月一鈎  
拖鞋又過幾峯頭  
不關活水終難止

只任寒雲到處浮松石何心分好醜主賓無禮足深幽  
日午一瓢夜一宿一生如此更何求

自來不肯常安住但有茅遮便暫栖鳥突寒烟尋別樹  
風吹殘雪度前溪沙彌歡躍面多垢耆舊威儀首盡低  
最愛近邨好兄弟松花和蜜賤如泥

張太守入山

何事遼陽太守來亂嘶五馬向荒萊漫拖草履筇扶出  
竟把山門雪踏開閒話無過四五句寒泉連遞兩三盃  
極憐庭樹鳥驚起一直穿雲去不歸

題且過庵二首

山邊架屋偏留我雙袖龍鐘豈有他道法也因長病減  
閒情畢竟老年多自將破罐炊水食偶就新篇向佛歌  
昨日已過今且過不知明日又如何

二三弟子亦多事執卷時同就薜蘿不碍書聲侵曉磬  
莫教世事掛庭柯虎常問訊來空砌人或每詩上雪坡  
昨日已過今且過不知明日又如何

偶成

莫道僧閒閒不得幾多情事撥難開芥茶帶梗敲冰煮  
山藥連皮拾糞煨夜聽犬聲知有虎晴拈雪瓣恨無梅  
尋常日午門猶掩只恐溪雲撞入來

同雪公遊千頂紀事十首

有小序

余出塞五年始遊千頂時大雪初晴由大安過  
祖越入龍泉與山中耆宿團圞二十日蓋壬辰  
春二月也十月復遊甘泉取道孤山入龍泉因  
有大寧之役兩宿而去癸巳春顯律師邀入駐  
蹕十餘日遂繇向陽登山過一月大雪如初遊  
甲午春至香巖緣諸老闢荒歡迎吾師與天然  
兄藏錫于此故特一至諸未及也八月與木公  
同遊霜葉滿山如錦前數遊所不及迨乙未七  
月香巖新像成送入山然止香巖諸未及也八

月赤公至又偕入山遇雨大安道上殊草草杖  
頭各一點耳丙申四月顯律師開戒香巖予隨  
入山然止香巖諸未及也五月赤公偕天公入  
山拉予同行以馬疲止向陽計五年凡十登山  
前後俱未有詩去歲九月雪公業與予約以他  
阻今歲八月乃堅志入山并不令家人知以廿  
三日繇瀋出門行百二十里宿泐水次過遼陽  
宿駐蹕次向陽過七嶺浣熱泉宿祖越因登仙  
人臺絕頂予向以病不敢登高然心甚壯今得  
歷盡諸險非獨前數遊不及卽同木公遊依然



一丘一壑之見耳仙人臺直下卽香巖元大德  
雪庵大師所居塏現存塏銘則學士陳元景所  
作鄂國公史弼所書其篆額則昭文館學士李  
傅光也千頂無舊碑僅此可讀次過石橋從別  
道入龍泉兩宿雪公有詩予不能和次重遊祖  
越前後亦兩宿太守張公使至雪公分袂還瀋  
余移寓且過庵適阿字姪從匡來話及千頂阿  
字遊興詩情俱勃勃因觸動習氣作紀事詩十  
律似阿字兼寄雪公然不過畧紀一時情事巖  
壑之趣松石之奇百未盡一願雪公作一遊記

刻之仙人臺畔毋使山靈笑人

去歲菊花曾有約今年不待菊花開予先渡水凭鞍立  
爾自衝風帶帽來曠野逢人偏問姓殘陽投寺且擎杯  
此是山行第一日鐘聲佛火共徘徊

過橋卽是遼陽郭郭外行過淚已潛一郡嗷嗷鴻乍集  
千年杳杳鶴無還纔看老女孤墳草又上前王駐蹕山  
我倦欲眠依舊土磷砢石壁任孤攀

望見登峯剛八里到來門徑各鮮新不因此地禪居壯  
邪識長邊古佛尊蓄瓜欲比蘋婆味見樹還生桃子津  
夜半犬聲何足怪山中魑魅亦親人

千一詩集 卷十三 五  
經過七里泉聲熱欲洗袈裟未有塵前者何曾是山水  
從茲無所不精神松陰短短露雙塔梵宇峩峩見一人  
却喜凍桃初摘下石坪分啖不辭頻

夜來已飽深林氣曉起仍添遠壑情  
點撇龍泉鄰衲意  
愛尋唐代舊鐘聲龕雲尚吐將軍氣巖石還鐫御史名  
百丈懸蘿千折後門前峯湧萬波生

幾度登山不到頂此回到頂畏登山九州細碎烟塵裏  
萬里虛無指點間雲在極低那可踏天雖至近竟難攀  
急須携手下山去縱對仙人無好顏

半日不離松霧裏牽藤穿穴各忘疲纔披破衲瞻新像

旋洗重苔讀古碑幾處茆堂聞蟋蟀千年石甕守熊羆  
僧頭似雪心無事手煮黃齋進白糜

不借仙人九節杖石橋幾度又攀躋但隨虎跡過巖畔  
漸聽龍吟隔澗西軟棗必須親手摘老松不過與肩齊  
淹留兩日非關主坐愛屏風近鳥啼

流溪認得曾遊處更欲搜尋到別峯山鬼似嫌黃葉響  
洞門都遣黑雲封龍芽頗覺僧懷苦羊肚何妨野味濃  
慚愧下賢賢太守難辭林壑一重重

半日浮生閒不得況連十日遍山屏解開藥裹包黃栗  
斫得藤條下翠薇人郭愈憐山水好逢人多與性情違

最嫌驄馬黃金勒依舊騎驢獨自歸

立春日

不辭留滯大關東未必長吹是朔風一世心歸松霧裏  
十年春到雪花中羅浮消息應非遠粥飯因緣尚未窮  
從此市天多雨露曉聽雀語動虛空

元旦哭喇嘛二首

有引

余初出塞乞食南塢喇嘛見而驚曰師胡爲乎  
來哉卽解身上所披覆余自此衣帽贈貽不輟  
壬辰春率諸耆舊強余開法南塢南塢畏地也  
前此無掛搭者自余至雲水奔流龍象蹴踏始

三月朔至七月望凡百維護外魔不侵喇嘛之  
力也喇嘛西域貴種童真入道年七十餘癯然  
鶴立今歲五月忽思還本國諸老強留不可含  
淚而別七月音至已于季夏之末示寂寂時鼻  
垂玉箸茶毘頂骨不壞有梵書神咒數行金色  
爛然國王留建窣堵坡其徒勞藏奉二齒歸南  
塢撫涕拈香不特私感已也

滿頭白雪眼雙青方丈時時見執經四海幾回悲鶴夢  
一枝今又喪龍庭頂門有骨留金字南塢無人失典型  
見說國王齊下拜浮圖千古鎮滄溟

十年吾道塞風秋  
苑嶺傳來恨又稠  
葉是歸根看已落  
杯當沉海更無浮  
大荒一夜霜俱白  
氊帳千羣淚併流  
赤縣神州心碎盡  
更堪洒血極西樓

苗鍊師雪中入山相訪

煮窮塞石難充腹  
幾受刀圭不駐顏  
開到黃花辭絳闕  
携將白髮問青山  
漁舟尚可通源水  
鶴羽何曾下世間  
最苦十洲多少事  
尋閒一宿急須還

季三公書來并寄茶

自來不作長安字  
一紙驚看寄塞垣  
父子弟兄同友誼  
冰霜雨露總君恩  
十年尚憶三山月  
七椀還澆五嶺魂

大雁欲飛寒逾好時時傳語慰田園

同阿字諸子夜坐

流光如矢命如塵水作生涯鬼作鄰  
歲底又添門外雪燈前幾個嶺南人  
大家共話俱含淚各自傷心不爲貧  
去去且將拳作枕夢中同迓故園春

和潤季兄臨死詩

賦罷金門淚未收陣連珠海誓無休  
崖門一夜洪波接柴市千年正氣留  
已把髮膚還父母更將心膽寄春秋  
鐵函聞說埋羅嶽何日敲開拄杖頭

聞赤公專侍在茲省親回



尺書纔去雪風愁侍者重來泪更流京國銀盤能早獻  
邊庭金策可遲留但聞尊宿仍編履不信頭陀竟覆舟  
我亦是人添哽咽夜寒壘草滿心頭

丙申除夕和棲賢辛卯除夕韻

只因生長在遼東誰是無鄉老此中今夜盡勾積歲念  
明朝須發向西風哭猶有淚情非至吟到無題詩亦窮  
細看此來真寂寞眼前還得幾人同

丁酉元旦

自信分明兩道眉瓣香拈起更何辭死經萬後生方重  
春到邊來遠不遲屬國寧堪九歲待衡陽無復五年移

還家自是兒孫事誰道今年未可知

解嘲步謙公韻

北郊笑指峯頭老  
閒徧千峯兩袖書  
但使倚間無鶴髮  
何妨托鉢向雲墟  
食殘自覺慙穠易  
載酒猶聞剝啄徐  
珍重綵衣休惜我  
十年甘作雪中蛆

柱江至瀋相見有詩和韻

黑裘未敝恥書生  
匹馬春風獵獵輕  
孤管欲收寒谷泪  
空囊一瀉大江聲  
叔癡不負鴈原夢  
僧老難忘鶴嶺情  
世上有人天有眼  
千年終厭話荆卿

九日送阿字

經歲團團淚未收菊花重惹一番愁來將白紙尋黃土  
去挾新篇返舊丘太乙峯頭頻悵望姑蘇臺上莫淹留  
而師若問寒邊事休話寒邊雨雪稠

重送阿字

送送還牽老衲衣故山終恨不同歸好從瀑水投寒句  
又向梅花覓破扉冰雪已多曾徹骨蕨薇雖採未忘饑  
關門不禁南來雁何日凌空錫更飛

入山有感示諸子

海角虛舟聊欲寄深藏大壑亦空勞松根盤石生難直  
水勢依厓聲易高謾說一枝能自穩便教三窟竟何逃

殘身久拚餘雙眼萬古雲霄看汝曹

閱未央遺集有初夏同予入循州訪劉乃運兄弟  
詩末云令威他日歸華表定在循州古樹邊似  
爲予今日識也因和其韻

憶昔同乘訪戴船幾人同病合相憐風流雲散空予在  
雪壓塵埋又十年詩卷尚留前日月夢魂難覓舊林泉  
何時華表重歸去唳遍纍纍古塚邊

讀未央與荊公宅師談金輪舊事詩有感用原韻

人世難逢幾弟兄舊編重讀不勝情忠臣遺廟清珠海  
未央殉義後當事  
建祠于海濱祀之  
古佛雙林冷堯城  
荊公脫白後卽示  
寂今十九年矣

地下定知談往昔雪中難免恨孤惻只今惟有金輪月  
偏向樓賢破寺明

讀未央集有先文恪神道碑感賦

高塚前朝草木淒燈前雪底泣孤兒良弓久沒箕同盡  
華表空留鶴尚羈大節已昭懸日月千秋不朽屬文辭  
遙知定有人來過繫馬松根讀舊碑

聞老人復歸華首臺臺上林木加茂有終焉之志

恭紀

飛雪峯下卽華臺五百何年去復來田地荒蕪應再開  
松杉蒼鬱舊親栽靈山一會依然在塞外孤兒尚未回

三囑龍天寒已徹終期撲鼻嶺頭梅

寄華首舊住諸僧

何人同守故山隅雲散天驚歲月徂豺虎幾回經蹠踏  
門庭猶喜未荒蕪靈峯不逐桑田變大厦終憑衆木扶  
最苦楊岐舊監寺泥牀長洒雪真珠

遙哭劉乃運

卅歲論文爾汝交柴門雨雪每來敲朝雲墓側新鴛塚  
白鶴峯頭舊鵲巢留得眉鬚身後惜肯將風月死前拋  
于今哭子全無淚鄉國都來水上泡

聞謝伯子趙裕子二老友在喜賦

少小論交四十秋，驚聞二老足風流。  
長安市上韓康伯，衡嶽峯前李鄴侯。  
陵谷已移貧未改，親朋欲盡咏難休。  
白雲舊社時來往，定話冰天老比丘。

寄陳三官

三官廿載前爲予作幻相數十

五色憑君寫幻軀，流民一幅不堪摹。  
回頭細數平生事，屈指曾經念載徂。  
氣骨支撐仍是舊，皮膚脫落已全無。  
只今頰上何須問，但寫長天風雪圖。

憶暮春同阿字諸子遊千山

到處青山盡有名，大家料却舊鄉情。  
溪邊覓路花千樹，驢背迎人鳥一聲。  
石頂松風憑管領，峯頭詩句任交橫。

千仞竹枝蕭蕭去又向何山踏雪行

閩南塔易住持誌喜

六年前此豎簷竿萬古荒蕪手開難一喝青天砂磔淨  
纔揮白拂水雲圓象王行後狐踪集良木摧時野棘攢  
從此斬新條令出山門依舊海風寒

題作麼茆屋

手結枯茆傍古幢籬邊流水亦淙淙只愁雲擾常關戶  
爲愛山多盡著窓日午拾柴煨破磑夜深把卷對殘釭  
山中豺虎原無毒長護烟霞不用降

喜作麼迎師入山



弟子如林汝不才暮年猶得共徘徊酬恩莫過茅三把  
盡孝惟須水一杯衰老久應拚谷底是非曾不到雲堆  
況兼咫尺予同病曉夕還同笑口開

予去冬依證寓今冬依磬光皆手無半文喜賦

今年貧似去年貧窮鬼相逢一倍親衲底病肌寒有粟  
窓前積雪白爲銀半瓢薄粥分饑雀一碟鹽齏借遠鄰  
處處盡忘賓與主淡而不厭只因真

卽事

山中纔拆此封書憶別經今一歲餘路到窮時天更遠  
力當盡後計偏疎青衫無分常披雪白髮何人獨倚閭

翹望章江雲縹緲春風何事更躊躇

梅溪雪中相訪

驚騎瘦衛入山來爲問山僧戶始開  
萬里往還君自得十年先後事空哀  
囊餘前代書三紙話到深更水半杯  
兩度鵲鴿原上淚一時和雪洒山隈

山中讀蘿石先生家書

柴市經過淚已前更揮餘淚拜遺箋  
數行尚自如生見一線仍存未死前  
耿耿丹心千古後茫茫正氣萬山巔  
伯夷此日應相笑重唱薇歌十二年

聞李苗兩道友有唱酬篇什雖未得讀知非凡響

遙有此和

蘭沙如霧倩藍叢縹緲鸞歌下遠空玉露只垂金掌內  
仙飈常發御垣東人間兄弟何能及塞外交遊孰與同  
春到定尋源水人墳荒坐聽碧雲中

喜聞左三哥回

終歲呼天恨莫通歸來如舊破囊空交情已見心方歇  
遺卷仍存道未窮日冷北堂烏漸老雪深大漠鴈誰同  
從今穩坐茆簷下敝絮殘氈耐朔風

贈少年道者

楚人

小小躡蹻入柴宮翻疑百歲貌如童種桃花發上林畔

搗藥聲聞禁苑中  
巫峽宵沾神女雨  
洞庭曾御大王風  
年年只見天恩濶  
不信人間路或窮

客有期予春初同入城者

一臥山中心事畢  
重新細碎學威儀  
休將白眼看林鳥  
屢繫長衣接澗麋  
纔話人城心便小  
嘗教伴雪禮何知  
由來分衛存深意  
古佛遺模苦莫辭

日暮

方悲歲逼夕陽低  
寒滿空山雪滿溪  
爲憶舊居知客眼  
偶懷好友得新詩  
身閒幸不隨人轉  
心苦全然著霧迷  
拋却杖藜還獨坐  
壁燈未點暗恹恹

遙哭與然師

弓劍叢中識面初，半牀風雨共歔歔。  
憐予不覺十年過，哭爾仍存萬死餘。  
雙履已傳葱嶺雪，空囊猶簡白門書。  
何如一副無情淚，歲歲峯頭濕破裾。

牛莊問阿字諸子信不得

秋風柳櫪兩肩橫，草履猙獰布袋輕。  
滄海無踪魚有腹，白雲有路鶴無情。  
行當野雪衣偏薄，吟向寒梅句亦清。  
老夢獨能追去處，依稀猶見弟和兄。

喜雲堂禪人入山相訪

未到歲除剛數日，何人騎馬入山來。  
欲從南越通消息，

曾向東齊撥艸萊屋裏無過雲片片巖前依舊雪皚皚  
好歸直爲而兄道不是寶山空自回

戊戌元旦

一莖白髮荷皇仁況值年年帝里春千頂曙光雲外出  
二陵王氣雪邊新放流久已成鄉土老大無拘只病身  
是處有山客我住桃花翻笑洞中人

開經日遙祝檀那盧太翁太夫人雙壽

火宅初離望轉奢何人等與白牛車盧公傳法燈千燄  
龐老齊眉佛一家曾囑王臣山上會新開龍藏海東涯  
人天百萬歡同祝遙獻優曇一朵花

贈湯官師

萬里相依豈偶然，選官選佛似君賢。  
薇羹屢爲伯夷餓，艸榻偏容普化顛。  
膏澤諸山時沃若，清風四壁本蕭然。  
晝長客去無餘事，一卷金剛自歲年。

贈藏主師

驚傳白馬度關來，大法東流亦快哉。  
剖出微塵憑慧力，插將莖草仗雄才。  
竿頭但進看飛鳳，塵尾時揮起怒雷。  
溝壑餘生吾自分，雙眸何意獨君開。

步滄兄見寄韻二首

知罪從他爾，獨親憐予萬里一孤身。  
平生本自無相識，

世上于今有幾人清泪屢憑沙塞雁衲衣猶寄玉門春  
驚聞杖屨南中去風雨蕭蕭入夢頻

故人何處思滄茫幸有音書未久荒布帽殘經情繾綣  
黃沙白日泪淋浪歸來幾見千年鶴夢去還尋五石羊  
門外孤松高百尺寒霄猶得伴冰霜

贈天鑒師時將還孤竹省墓

共向高林借一枝心期萬古可誰知織鞋有恨陳尊宿  
玩月今同王老師寒磧頓能忘患難衰顏偏自惜分離  
公歸無復薇堪采雪滿千山足療饑

正修書記錄成來呈



笑汝經年執管隨長言短句益支離豐干到死還饒舌  
覺範投荒亦賦詩秋老野鴻書遠碧夜深山鬼哭空池  
如何錄取聲前話風靜高林月落時

得張覲仲書

忽驚天上寄來書火盡西園一木餘苜蓿有根開絳帳

芙蓉無蒂碎香車

覲仲元配爲余第五妹以救母死故云

儒門淡泊思靈

鷺芸閣荒頽泣蠹魚

西園公遺書數萬卷手著亦不下萬卷俱火燼

壠艸尚沾

半子泪雪中翹首幾躊躇

千山詩集卷十四

博羅剩人可禪師著

書記今羞編

五言絕

枝上雪二首

鳥宿寒枝動晴天雪更飛  
旣沾臺石冷復上老僧衣  
葉盡枝方滿時時飄素埃  
晚風吹未了疑是野梅開

殘葉

已被晚風促復受曉霜侵  
亦知終不久珍重片時心

題范寬真跡

巖壑層層古全非近日山山中最深處置我于其間

同大翁看古帖

一筆筆模楷一葉葉精神驟喜多酬接徐思晉代人

題大士像

趙孟頫筆

終不得自在卽此苦何窮願取楊枝水一洒朔庭空

殘菊二首

殘菊深秋裏無人雪一堆莫嫌憔悴甚曾見十分開  
世情偏愛菊吾意獨憐殘暫收無限泪權作片時看

題去鴈送寒還二首

數載同樊繫秋來爾欲飛只疑天路濶烟雨尚霏微

孤飛爾自可回首念同羣欲向青冥訴惟愁總不聞

東甍築

一日不相見新詩又幾篇急携來共讀午後老僧眠

雪十二首

歲歲易相思五月六月時莫愁久離別亦有霜飛飛  
古瓦疎不完白雪飛滿牀抖擻一片袖猶疑是月光  
半夜披衣起宛在梅花村梅花開易落白雪長到門  
昔日趙師雄月明林下臥美人寒不來花落空朶朶  
寒月照野雪一片老僧魂夜深招不得時來白板門  
天地正高寒白月來相佐匪特肝腸如渠今卽是我

銷金帳不知此中有至味俯仰天地間飄飄吾與爾  
相對寂無言懷人一萬里只在庾嶺頭欲折不堪寄  
爾從天上來天上寒更多年年見飛下欲上苦如何  
一齧齒牙清再齧心髓化只合深山中大石長松下  
入世隨方圓淨穢亦無別只有一點心不肯因人熱  
人世一火宅那堪作久居六載雪山中苦業猶未除

淚

淚非還魂香空流亦何益只愁雙眼枯還留看天日

寄戴三

農事今何若秋風舞袖單新詩遲汝讀直可柰饑寒

落葉二首

蕭蕭淚獨零落葉逐風輕秋草甘同死真慚樹上榮  
豈不戀本枝秋霜不可耐明知春必來搖落安能待

秋風引

秋風滿天地塞上最悲涼樹聲和暮角盡捲入離腸

古歌

白日去不息松風柰爾何爲問市朝客何如山上多

同傅陳二子送北里之堡中

只有兩旬別渾如送遠心把持不忍去直到日西沉

荅育侍者

松枝有東日飄雲無返期邊霜寒徹骨親到始應知

寄淡仙

我昔訪君日君來見我時一般真意味不許別人知

寄介子

風雨隋堤上相逢泪盡彈只今橋畔柳應念老僧寒

寄仙裳

執斧一長揖白門雨雪深十年曾有約珍重昔時心

寄寤明

貧極心無改所歡惟友朋平生一片意大半在孤僧

寄與田

何人不相識斗室傍城隈聞有不平事輕身半夜來

寄一輪

衲衣留俠氣不獨是深慈中夜聞相憶牀頭白月知

寄一指

閉戶見青山松風盡日閒只愁三月夢輕度薊門關

寄黃子

詞賦髫年事腰間三尺寒鐵函無限淚獨許老僧看

寄楊三

夜閣孤燈話愛君此意真可憐三幅錦蓋却古今人

月二首



月色本無私  
水寺孤人得  
長安富貴家  
燒蠟如白日  
月來靜後多  
況已刈禾黍  
一望西盡頭  
茫茫不知處

北里暮歸

歸路不覺遠  
月出靜林巒  
舉頭貪看月  
誤到別家門

同甦築看月

明月在江南  
夜夜看逾好  
今夜照兩人  
各自傷懷抱

臥月

塞上亦良夜  
明月本無心  
照衾復照面  
一一感人深

秋吟二首

蟬聲隨落葉  
飄墮枕頭邊  
我心與空際  
胡爲白晝眠

秋風不相諒吹我破衣裳獨起向前堦誤踏草上霜

月

我同明月來一路照秋草月到朔庭荒人到朔庭老  
夜

明月照夢中荒荒萬里白驚起攬衣裳猶疑是鄉國

同傳陳二子看喜哥

絕漠無芳草王孫那得歸最憐雙眼淚不識爲誰揮

春夜懷耳叔弟

夢去長不到夢來應更難相逢愁愈慘不爲隔重關

雪中訪大翁

我從雪裏去君自雪中來又是今年起相過第一回

千山二首

憶山頻得句到此句全無扶杖沿山覓時聞山鳥呼  
策倦疑無路低松暫可憑老僧遠招手更上最高層

同謙受枕上

枕邊不計程驛路如可記一樣夢還鄉多君五千里

卽事十首

鋒鏑暫云免潦旱乃相仍上天亦何意厭此蚩蚩生  
峩峩七尺軀不及薄銅錢塞外多霜雪猶云得所天  
尋常重別離此日不同顧脫手卽生天得錢差可度

同生旣不能同死亦徒爾爾去未必生且非眼前死  
汝留枯我腹汝去剗我心相持不肯放血漬破衣衾  
臨行重囑咐人世貴自持願汝得飽日毋忘饑餓時  
所謀在升合頓使骨肉分易險但相守素心安可論  
微賤勝于鬼婦子亦閒閒始知情與操惟存一飽間  
自顧安足惜顧彼良可悲安得天雨粟毋令強別離  
身死固足悲身辱亦足耻與其辱以生毋寧饑以死

弔昭君塚

莫作枝頭花寧作塚邊草草色至今青花開一朝好

馮公雪阻再留一宿

何必春宵好千金屬冷邊安能天上雪直下到明年

寒風

寒風一點淚我自昧其繇久厭丈夫氣何況女子愁

送大來先生葬六首

全軀違夙心無灰庶速朽山前蘿石翁相待亦已久  
覆土勿使厚種樹勿使密萬古與千秋長令見天日  
當年吏部公四海多金石今日素車來曾否舊相識  
悲風吹不歇孤月近爲鄰世上亦寥落何如山鬼親  
生臥冰雪中死埋冰雪下藉此省見聞天地爲長夜  
斬却墳前松遠山青歷歷毋令後世人繫馬長太息

接鄉書二首

鄉國久無望仍存劫火餘  
淚流雙眼盡得見故人書  
片紙來天外封題自廣州  
開函不敢讀一字一生愁

還山憶舊十首

言笑不可覓暗風吹庭隅  
開門見蘿月恍惚照髭鬚  
相見必破顏來往永無期  
出塞將十年始如初逐時  
挾卷出相尋往往偕風雨  
從此得新題但向松間語  
大音易銷沉天地終何有  
茫茫東海沙斯人豈長久  
枕中百十篇暗室生霹靂  
夢裏長把持祇恐蛟龍攫  
雨盡禽聲寂空山似有聞  
十年稠疊恨不是爲思君

常遣候君來松枝掛月白君今逐浮雲猶掃松根石  
山中多虎豹月黑恐魂驚君如來入夢須隨明月行  
約畧夢中見一半苦吟聲此夜分明甚猶恐非平生  
最憐同出塞不得上千山屢咏山僧句常思山鹿閒

真乘師臨行口占

君去何須恨還如未到時相看無一語那得送行詩

同諸子煨山藥守歲

歲去誰能守山寒味獨長舊鄉雖有芋未必勝他鄉

古別離二首

殘月送君去還復照妾歸生憎日光奪不得長輝輝

男兒志四方不信別離苦妾死化鋼鋤鋤斷四方路

懷舊有感八首

孤吟必憶君一憶一回老淚滴王維句勸君苦不早  
我生苦憶君我死人必憶胡爲眼前光日日成虛擲  
死去悲已遲生存歡未極悲歡共一時速哉各努力  
從君百千能從君百千識雙眼倚雲天到底淚一滴  
口說遍河沙毛髮不得力人卽任君欺君欺君何益  
見人手自遮千百幻何極人去手自捫一點光歷歷  
無病有千春病來在呼吸細碎簡平生收拾將何及  
好日信無多良會誠難值切莫俟其時始嘆空相識



首山律主過訪

我居千山南爾居千山北去來各自錄大都山路直

木公寄衣

城中寄衣來感激淚如熈瓊玖安足報願勿忘饑寒

山雪二首

青山面面同渾如張素紙欲蘸萬丈松盡書太平字  
一片嵯峨石中餘小徑通自從雪積後那得世人蹤  
山中清且閒寒雪共朝夕除却自行踪并無麋鹿跡

對月

明月但照雪不照世人心雪深惟一色人心種種深

題作廬山居十首

築室最高頂山高雲逾閒回看予住處猶覺在人間  
天近龍長護山空雪獨飛祇愁林鳥出帶得世塵歸  
遠山俯可拾北斗近堪凭共在白雲裏君居第一層  
仰臥星辰見雪來白滿牀更添簷上溜氷柱列成行  
無事扶筇出遠尋麋鹿遊莫行松底路松子打人頭  
耕田餘半畝今歲稱大熟小確貯三升大瓶貯一斛  
粗糲可充腹生涯實有餘盡除今世事留得古人書  
參葉聊當茗無人自一杯門前屐齒響定是老僧來  
日午尚高眠問人雪霽未沙彌九歲餘不識人間事

山巔如可上更上一重重總斷樵人路低頭謝舊峯

山曉

山曉冷恹恹開門雪覆溪偶隨麋鹿跡不覺過橋西

山暮

薄暮一山風鐘聲在半空雲多遮不見不出此山中

接爾珍書

索笑堂中客十年塞外居主人猶不忘遙寄八行書

夜坐偶成二首

責躬宜獨厚責人宜用寬成仁誰不願殺身良所難  
聖道非一端祇貴審其真殺身有時易所難在成仁

臘月一日大雪病中口占

已近予生日彌天大雪飛年年惟抱病淚濕破僧衣  
侍者勸予病中罷吟賦此示之

我死終無恨我生良獨艱不因頻得句何以破愁顏

子夜歌二首

素絲繡荷花雜絲繡荷葉荷葉將比君荷花將比妾  
君行路非一君心千百岐簷前垂蟾子空費腹中絲

山夢

入夜魂無禁皇恩亦已渥故山不時歸歲晚歸逾數

獨望

歲暮登高頂心心眼瞑烟東南頻極目不見舊鄉天

夢

夢久厭城郭爲君時往還不知城郭夢曾否到深山

接諸公札

屢接城中札長爲野老憂一從入山後半字未曾酬

寒夜風

歸夢不覺遠合眼海門潮羅浮剛咫尺風吹斷鐵橋

披裘

頑石凍不裂雪多山更幽十年冰裏過此日披羊裘

夜雪

寒風夜蕭颯門外白皚皚窓破何須補從他雪入來

千山詩集卷十五

博羅剎人可禪師著

書記今差編

七言絕一

懷羅浮

鐵橋西畔卽吾家  
回首黃雲萬疊遮  
四百峯峯皆有夢  
空從笛裏見梅花

秋月四首

碧天湛湛自孤身  
淡寂何言一倍親  
此是山樓舊相得  
眼中無復嶺南人

秋光深淺我全知正是無人獨立時  
便欲關門情莫奈驚鳥啼在第三枝

出戶連天動遠思沙明如雪沁肝脾  
夜深一片蒼茫色不是流人絕不知

高樓鐘歇雁聲沉一葉隨風到客心  
却憶素馨田畔住美人何處獨披襟

塞上四時歌

三春不見一花開獨有城頭散落梅  
却憶江南晴日好屐聲齊上鳳凰臺

紛紛牧馬問平原望見炊烟尚有村  
白骨未埋青草遍



不知何處哭王孫

未到中秋吹已寒  
每因踏月怯衣單  
何須更聽悲笳曲  
白髮絲絲葉葉丹

牛車咿軋河上行  
下有蛟龍凍不鳴  
直待冰銷能幾日  
寒風吹盡煖風生

寄與然師

破寺松風臘月時  
君行潑墨我題詩  
天山無限巨然筆  
不到邊庭總不知

接笑峯師已丑二月札

時辛卯五月也

三年一紙到關東  
江月邊雲萬里同  
研淚題詩連夜寄

不知何日達南中

暮過甦築齋留題

原是道傍半間屋自君到此足優游縱令野月長相接  
不得僧來也不幽

懷陳子

十日不來涼又到預愁衣薄不禁秋風吹禾黍人行處  
疑爾相隨老比丘

喜王三爲陳子覓得館地

朝夕隨僧嚼冷齏鄰翁爲覓一枝栖解開布裹殘書卷  
幾個兒童勝牧羝

懷大翁

詩滿奚囊麥滿篝別纔幾日忽驚秋只疑弟勸兄酬處  
白水山花一片愁

贈戴三

一月城中走一回路傍得句倩僧裁縱令黃葉如金貴  
不得而翁笑口開

時來城賣  
烟葉故云

訪陳子新館二首

市肆開門講學初雖無僖石勝歌魚日中欲效王克閑  
只賣羊皮不賣書

半歲三遷古佛家雲門胡餅趙州茶莫因舊結僧緣熟

仍借田衣作絳紗

重陽前一日雪

自啟柴扃望遠峯鄉心落葉一重重似憐登陟添愁思  
處處臺先著雪封

九日冒雪訪我存

定是寒僧獨扣扉書聲猶共雪花飛市中來往空如織  
就裏無人是白衣

獨望

獨望寒山山欲頽城頭暮角一聲催鄉心片片隨雲去  
只恐西風吹又回

孤燈

孤燈如鬼夜幽幽白髮頻添照不休最是愁人風雨後  
一生心事五更頭

殘菊

登高過後冷淒淒獨向平原望眼迷已是不禁愁又見  
一枝殘菊夕陽西

小春

九十春光寒夢裏小春敢望暖風回遙知故里無人處  
又是梅花繞屋開

甦築得麗服

何以家園衣敝裘寒邊翻作五陵遊卽今風雪全無患  
繡錦重重一裏愁

題我存新齋二首

雪天誰復贈緋袍殘卷寒燈道自高日裏市塵三萬斛  
夢中化作大江濤

車馬喧填戶不開身雖欲稿恨難灰空齋最苦鐘聲近  
夜夜還家半路回

刺翁來城見訪

到城先自問殘僧老大關情一片冰莫爲空門能釋恨  
空門此日恨尤增

重和堡中八咏

北山

執斧歸來泪未乾  
北山山下雪風寒  
當年恨不移文早  
只恐移文也不看

夾河

夾岸遺黎意自淒  
滔滔何處武陵溪  
河流亦厭寒氷苦  
不向東頭盡向西

石人

石丈巖巖孰可儔  
蒼天終古自悠悠  
我來說法無人會  
只有山前暗點頭

永興寺

野寺開門雲亂飄  
魚聲燈火各蕭條  
淒淒木佛憑傳語  
只恐寒多我欲燒

蓮渚

夢破荒天苦樂齊  
情存淨汗便成迷  
東方亦是蓮華國  
何事迢迢願更西

耕烟

秋雨連綿失所天  
又聞鹿豕占餘田  
可憐生計歸黃葉  
無奈飄零不值錢

菜蕨



平生勲業醉醒間到此方知稼穡艱薇蕨幸留堪緩死  
莫將饑餓怨西山

觀魚

誰道洋洋可樂饑淒涼抱鉞未彈時故鄉自有鱸魚膾  
只恨秋風憶已遲

喜陳子罷役

從此沙邊好放吟數莖白髮祇黃金相逢仙客休言藥  
若教還童苦不禁

懷李鍊師

故鄉到去想全非恨不當年拔宅飛逢著相知棋莫看

西風華表待君歸

東焦冥

去歲憐君餘一第  
予今一第昧存亡  
囊中定有還生藥  
肯任龍沙白骨荒

訪陳子阻雨

大風大雨掩僧扉  
拄杖閒拋咫尺違  
料得棋枰敲到晚  
不堪擡首望雲飛

訪陳子二首

山寺相尋爾尚存  
強開顏笑暗聲吞  
最憐縷髮餘霜雪  
猶有白頭人倚門

經年抱缺向空門  
白水黃瓜老瓦盤  
不是閑黎鐘忽斷  
何人真感孟嘗恩

寄界繫師

少小叅尋老大僧  
雲山歷盡碧層層  
關東白日寒如水  
欲寄清涼照古藤

寄功檀行者

如何仍滯故人家  
念汝辛勤淚點沙  
歸語故園諸弟妹  
孤僧未死海東涯

夜雨懷傅陳二子二首

風雨同牀定賦詩  
詩中定話苦相思  
老僧恨不衝泥過

只恐天晴又別之

無雨無風愁寂寂  
大風大雨益淒其  
不知絕塞如何好  
便使同牀淚亦披

同諸子訪耀寰不遇

車馬全無戶半開  
尋山應到日西回  
兒童不用詢名姓  
定是吾儕三五來

題扇送耀寰

贈別慚無金匱匣  
白團新墨共淋漓  
移家不少王侯貴  
那得吾曹半句詩

題鐵嶺花樓

貂錦何年去盡樓樓前荆棘滿空秋行人立馬一擡首  
登笏還疑在上頭

秋燕

海水蒼茫何處歸深秋猶自傍人飛舊時王謝皆泥土  
只恐重來我又非

聞宗尉爲戴子直冤

耐盡冰寒鬢已霜春風一點到窮荒委繚僅見方義尉  
更有何人贖仲翔

贈壽光三公子

炯炯雙眸氣食牛最憐未解說邊愁他時得返絃歌地

却望寒水是舊丘

懷寒還

數載交遊一瞬休  
計程應說到皇州  
鄉關重霧難回首  
何處霜風不是愁

送戴三

半揖鞭梢雪載途  
懷中一幅流民圖  
金鷄計日傳邊海  
肯遜緹縈却丈夫

解嘲

莫笑孤僧老更狂  
平生奇遇一天霜  
不因李白重遭謫  
那得題詩到夜郎

問我存病

殘軀何異委寒林絳帳蕭條夜雪深  
獨有病魔無冷煖長邊萬里亦相尋

懷苗鍊師

一度關門便是仙纔經兩月已千年  
鶴飛縱有歸來日只恐人民未必然

聞薪夷遊豫章

最是一身無著處隨風直向大江西  
匡廬山下子曾住應訪茆堂過虎溪

春前一日

臘盡依然處海濱寒風破衲易相親年來曆日渾無據  
未必明朝便是春

祀竈

絕塞爲神亦可憐一瓢冰雪獻尊前經年佳節同寒食  
莫把清貧訴上天

立春

清曉開門淚已披梅花一別永無期寒冰到死爲朋友  
便是春來也不知

枕上偶成

寒爐撥盡漏聲微獨臥泥牀攬襪衣枕上嶺梅三百樹



一時化作雪花飛

我存曉過

春來安得到柴扉  
望斷孤雲更不飛  
寒淚滿眶無地灑  
却將數點濕僧衣

雪中懷太翁

開門三尺沒空堦  
欲問袁安願又乖  
自是雪深堪葬骨  
更無餘地著吾儕

元旦拈香

野臣負罪海東偏  
羞搭袈裟見佛天  
一瓣心香和淚舉  
不知何處祝堯年

聞我存得仲氏餽貽

抖擻曾無一寸囤只將雙眼看殘年鄰翁斗粟渾閒事  
續得寒儒命一綫

偶成

今年更比去年窮夢到梅花香亦空抖擻破衾殘雪在  
無人知道舊家風

卽事

食得氷甜歲又新曾無好意別疎親從他唾面從他笑  
不改南蠻鵠舌人

麗大師寄梅花詩

一枝誰折寄遼東  
臘盡香殘夢久空  
欲擬報君寒徹骨  
祁連雪滿月朦朧

九日大風

年年九日怯登臺  
此日登臺眼獨開  
瞬息寒塵吹欲盡  
無人知自大江來

寄訊堡中吳子

莫爲饑寒瘦不禁  
三人惟爾絕來音  
孤僧有夢還應入  
辜負寒燈夜夜心

千山懷大來甦築諸公

幾年相約入千山  
萬丈枯藤我獨攀  
何日團團最高處

峯峯收拾破囊還

題淨瓶峯

案頭恰置此孤峯峯頂何人插古松爲問山靈如可借  
杖挑隨處得相從

千山寄諸子五首

一到山中便不同山翁只合住山中山中不盡憑題寄  
纔欲抒毫色色空

寸寸都堪屐齒留此中何處覓邊愁饑來無限青松葉  
更汲寒泉煮石頭

掃石焚香只待君滿溪流水共云云閒愁抖擻洞門外

莫帶纖纖亂白雲

千峯殘雪掛松杉  
月下孤僧經一函  
何必浮山歸便好  
病軀今已委寒巖

破衲蕭蕭白一峯  
思君斜倚最高松  
爲留一片松間月  
閒疊溪橋候短筇

贈紅鴉

雪裏驚看花獨開  
燕支山上曉飛回  
莫憐幽谷寒無奈  
爲帶春光一點來

別千山

片雲相伴出山扉  
拄杖挑將破衲衣  
爲語洞猿長守護

石牀茶竈待僧歸

重入千山二絕

偶然飛去復飛還  
幾見雲能離得山  
舊路依稀猶可認  
石橋流水第三灣

萬壑千峯是舊知  
此回相見異前時  
寒鷄亦似曾相識  
兩兩飛來低樹枝

重留龍泉靜室

岩邊茆屋山林梢  
亂石支牀雪半消  
初得松枝重洒掃  
壁間猶掛舊時瓢

入山遇雪

去歲到山曾有雪今年踏雪復登山泉聲滴瀝還如舊  
山共孤僧添老顏

山中同諸老夜話

燒松共話到更深衣薄鐘殘雪又侵住得此山非近世  
不須重問祖師心

訪無心師

裂却青衫三十年孤峯獨自抱雲眠相逢休問今何代  
夢滿雙眉月滿天

千山二首

三月峯頭春意微晝晴時見一鴉飛東溝林外聞人語

野老提筐摘菜歸

天與空岩養病身  
衲衣無復惹紅塵  
故山久已荆榛遍  
誰料桃源却在秦

千山雜咏五首

石人招我上高臺  
極目中原一點灰  
半局未收雲黯黯  
只愁北海又生埃

空傳玉匣自神京  
大石泉流骨亦清  
鳥篆殘碑風雨後  
依稀猶認雪庵名

枯藤爲幕月爲堦  
半卷蓮經伴古崖  
甲子坐窮寒未了  
掃將殘雪葬枯骸



誰把燕支染白雲桃花流水日紛紛祇疑古寺頽垣下  
猶壓當年蛺蝶裘

歎惜前朝五寺僧雲窩占盡一層層卽今夜雨青燐遍  
疑是琉璃古佛燈

喜梅君磊從江南寄詩

天外何人贈一枝未曾相識足相思翻憐蘇李賡酬處  
那得中原幾首詩

遼陽回訪大翁

可堪隔別一年期見面依然霜滿髭客底唱酬良不易  
老僧去後更無詩

喜遇沈謙受

孤身絕域守寒羶盡日無言意悄然自悔罪深餘舌在  
見君翻似對枯禪

高寒還叔姪復至

何意重逢黑水濱邊愁又覺一番新冰霜已是經來慣  
況復殘僧是故人

雲間錢鐘二子至

相將微喘度龍荒尚有寒冰苦未嘗却怪老僧愁不死  
殷勤先問耐愁方

聖秋寄詩并雙管

一緘珍重寄遼東詩卷仍將雙管同舊硯已焚無所用  
祇應新句伴寒風

往遼陽二首

滿頭短髮白離披正好團圓又別之莫訝一挑霜雪重  
袈裟還裹故人詩

平生作戲幾逢場每笑河流盡日忙最是雲閒閒不住  
又隨風雪過遼陽

與諸子約三日春遊第三日阻雨二首

非關風雨能相妒自是人間勝會難不爲此番遊屐阻  
連朝終作等閒看

昨宵有約東郊外  
枕畔風拖急雨來  
自此得晴便相過  
無花亦到日西回

雨窓讀詩娛

此日閉門惟伏枕  
枕邊一手把殘編  
誰言絕塞無朋友  
紙上相逢百十年

大雪李苗二鍊師同諸子過談竟日

莫怨崎嶇屐齒艱  
但逢好友足開顏  
囊中謾說長生藥  
且得浮生一日閒

寄江南諸同社四首

白日歌聲滿大荒  
于今斯道屬遼陽  
翻嫌李白歸來早

不得長吟向夜郎

誰言雪磧一僧孤  
白拂交橫沸海隅  
鄭俠若令生此日  
竹林蓮社總應圖

餓到今稱飽亦頑  
墨臺真樂在西山  
兄酬弟唱知多少  
空使薇歌落世間

無罪還應出塞來  
石頭舊社長蒿萊  
會稽禹穴饒探遍  
不到天山眼不開

慈航偶成二首

曲肱偏容老罪夫  
天山從此闢荒蕪  
請看自古傳燈者  
問道曾來九譯無

百巾氈裘競獻酥杖頭指處朔風驅介夫若見綾千尺  
會寫長邊說法圖

大翁出塞亦旣抱孫矣復連舉四子戲贈二首

含飴亦自足歡娛又見雙雙挽白鬚便使鄭圖添百子  
可能代得老翁無

三年四讀洗兒詩大漠維熊夢亦疲紙筆未窮從所好  
只愁風雪夜啼饑

柬我存

幾人風雪共留連纔過清明便不然最苦枕戈人已老  
未曾先著祖生鞭

寄澹歸

曾向瓶窰覓幻身書來已是法中親  
何時飛錫同遶鶴來問壘壘塚底人

寄阿誰

精繪事

誰與天涯作比鄰題詩先問白頭人  
燕支久已無顏色好寫青山置我身

紀聞

閉門鎮日雨聲潺忽聽流民盡解顏  
縱使金鷄連夜發只愁飛不到雲山

題王公六椽庵

却因罪廢覺于于茶椀殘編足自娛  
室比維摩無一半屢將香飯致文殊

寄與公三首

水滿春江書滿車單騎何苦問天涯  
眼前無限悲秋客獨有君心待折花

聞君又已離孤寺畢竟是誰割半瓊  
珍重夜寒應早臥不須秉燭續殘編

茆庵燈火舊來過君自吟唔我自歌  
他日乘車休下揖但逢破笠不須呵

拈筆寄木公



去年相約莫題詩收拾殘生過好時  
白雪下來山又冷不禁孤寺遠相思

寄慰大翁

相看白首恨如何獨臥牛衣淚又多  
瓶口幾年知缺盡不須重擊瓦盤歌

寄潘公

萬里寒雲共掩扉如何朋好足相依  
情知鄉井無窮淚恐見傷心不敢揮

桃源詞二首

當年鬼哭便應焚灰冷難招坑底魂  
先世爲儒知不免

桃花那得到兒孫

鷄犬尋常得自由從來無喜亦無憂  
眼中若見秦時代滿洞花開也是愁

入山雜咏二十首

曲曲溪流去復回山花夾路石門開  
老僧望見頻揮手莫帶紅塵一點來

竹杖隨身任我移袈裟搭在矮松枝  
青山處處容吾住欲著茆簷便不宜

居山元是此山人似我山居日日新  
莫笑浮生無定止但逢好石足鄉鄰

莫問西來路不同何妨麋鹿得相從  
山山到處看俱好最愛溪南第四峯

橫路枯松掛古藤幾年踏雪到來曾  
偶看虎跡問人跡知是長眉赤腳僧

一飽欣欣樂有餘主人猶我我猶渠  
翻思二十年前事翠幙華堂是客居

老大無家亦有筇尋山山頂有高松  
苾鞋常恐行來遍一日排雲到一峯

杖頭到處是吾家瓶鉢都將掛樹樞  
趺坐偶然盤石上不須山鳥更銜花

已過溪雲幾十重忽聞林外一聲鐘欲尋人處無人問  
滿地縱橫是虎踪

一宿僧堂卽便行主人留客客無情磬聲只到山門止  
一路猿啼共鳥鳴

山花歷亂雜蒿萊一度來尋一度開猿猱不曾離舊處  
笑予頻去又頻回

一雙草履一邊瓢一卷殘書伴寂寥莫道無枝枝未穩  
從今更不羨鷓鴣

何處非吾得志時山麋野雀共嬉嬉獨行率意還同阮  
但到窮途淚不垂

半掩柴關一徑苔  
山梨幾樹落堆堆  
老僧定起開眸看  
疑是山猿拾果來

垂垂白髮坐淒淒  
盡日空山聽鳥啼  
笑指岩松高百尺  
入山時節與肩齊

千峯寂寂待知音  
人世紛紜那許尋  
不是我來頻寄迹  
孤他泉壑萬年心

市跡纔通便不清  
深藏塞外不知名  
中原無限佳山水  
雜沓人來亦世情

無如此地足幽棲  
滿眼蒼青我亦迷  
何處老猿來覓得  
又扶筇竹過橋西

閒踏荒萊見斷碑依稀篆跡似唐時  
此中或是唐朝寺問著山人總不知

采將山菜山柴煮更汲山泉徹底清  
野老自言年八十年年食此不知名

偶成

不因貧病不思鄉愁緒彌天恨夕陽  
自顧一身如此小千峯猶恨莫能藏